

**Dumonda da la fracziun da la PPS concernent ina survista e trasparenza davart ils augments dals custs en l'agid social**

Adina dapli personas retiran agid social e la singula persona retira en media prestaziuns adina pli autas. En tut la Svizra èn quai stadas ils ultims 10 onns prestaziuns d'agid social ch'èn – en media – 33 pertschient pli autas. Mo cun ils custs creschids dals bains immobigliars na possia l'augment dals custs betg vegnir declerà, è da leger en in rapport dal cussegl federal.

Sin la pagina d'internet da l'uffizi federal da statistica èn publicadas er las cifras actualas per il Grischun. La quota d'agid social è cun 1,4 % clermain pli bassa che la media da la Svizra (3,3 %), tuttina pon vegnir constatads er en il Grischun in cler augment da la quota d'agid social dapi l'onn 2010, in augment dals custs da l'agid social per persona sco er grondas differenzas communalas (cifras 2017). La quota d'agid social da personas estras è s'augmentada en moda surproporzionala ils ultims onns da 2,3 % l'onn 2010 sin 3 % l'onn 2017.

<b>Onn</b>	<b>Quota d'agid social en il Grischun en %</b>
2017 & 2016	1,4%
2015	1,3%
2013-2014	1,2%
2010-2012	1,1%
2009	1,2%
2005	1,5%

<b>Vischnanca</b>	<b>Quota d'agid social en % (2017)</b>
Tusaun	4,5%
Cuira	3,2%
Landquart	2,6%
Glion	1,8%
Tavau	1,4%
San Murezzan	0,5%
Trimmis	0,5%
Claustra	0,4%

1. Quant gronda è stada la media da las prestaziuns d'agid social per persona retschavidra en il chantun Grischun l'onn 2017, quant gronda avant 10 resp. 15 onns?
2. Co è sa sviluppada en il chantun Grischun las quotas da las personas estras e da las personas svizras en l'agid social ils ultims 20 onns?
3. Quant grondas èn stadas las prestaziuns annualas d'agid social a personas migrantas dapi l'onda da fugitivs a partir da l'onn 2015?

L'agid social sa cumpona da l'import da basa che consista da *daners bluts*, dals *custs d'abitar incl. custs accessorics*, da las *contribuziuns a las assicuranzas socialas* (contribuziuns AVS/AI e cassa da malsauns) sco er da las indemnisaziuns supplementaras da las prestaziuns liadas a la situaziun che ston – tenor las directivas da la COSAS – vegnir surpigliadas da las vischnancas sco dentist, custs da la canorta, bigliets dal traffic public e.u.v. Ed alura anc las numerusas *mesiras socialas* sco accompagnaments da famiglia, plazzaments en in lieu ester, supplements d'integraziun en spezial per personas estras. Da l'autra vart vegnan deducidas las entradas realisadas sez.

Dumandà è il svilup da quests *custs* en il chantun Grischun che la persona obligada da pajar taglia sto finanzia:

- a) Tge import han il chantun e tut las vischnancas grischunas sbursà per questas *prestaziuns* l'onn 2017? Quant avant 5, 10 e 15 onns?
- b) En tge secturs hai dà ils gronds augments dals custs?

Puntraschigna, ils 14 da zercladur 2019

**Hug**, Favre Accola, Brandenburger, Della Cà, Dürler, Gort, Koch, Salis, Weber, Renkel